



40 Wakil Media lawat Hutan Simpan Ayer Hitam , UPM



PUCHONG, 28 Jun – Seramai 40 wakil media dalam dan luar negara yang mengikuti program Selangor Shines Discovery FAM-Tour 2010 melawat Hutan Simpan Ayer Hitam, Universiti Putra Malaysia (UPM) di sini semalam.

Program anjuran Selangor Tourism dengan kerjasama Majalah Gaya Travel itu turut dihadiri wartawan dan wakil syarikat pelancongan dari Jepun, Filipina, Indonesia dan Australia.

Dalam lawatan tersebut, wakil media berpeluang meninjau persekitaran Hutan Simpan Ayer Hitam dengan diiringi Timbalan Naib Canselor (Penyelidikan dan Inovasi), Prof. Dato' Dr. Abu Bakar Salleh.



Dato' Abu Bakar berkata kerjasama media tempatan dan luar negara boleh mempromosikan UPM sebagai lokasi education-tourism di Selangor.

Wakil media kebanyakannya melahirkan rasa kagum dengan persekitaran kawasan hutan itu yang bersih dan diurus dengan sistematik termasuk keindahan air terjun dan tumbuhan herba yang dipelihara oleh UPM.

Mereka dibawa melihat aktiviti pelepasan anak ikan Lampam ke sungai dan meneroka tumbuhan herba di dalam hutan dengan menggunakan peralatan teknologi iPad.

Media juga berpeluang menyaksikan demonstrasi video oleh Penyelaras Unit Biodiversiti, Dr. Faridah Qamaruz Zaman mengenai tisu kultur dan taklimat ringkas Hutan Simpan Ayer Hitam oleh Dekan Fakulti Perhutanan UPM, Prof. Madya Dr. Awang Noor Abd. Ghani.



Wartawan dari Jepun, Ishiyama Akito teruja melihat keindahan air terjun di hutan simpan itu dan bercadang untuk menulis keunikannya di Jepun.

Sementara wartawan dari Korea, Pak Wong Sun pula berkata hutan simpan itu merupakan lokasi yang sesuai dijadikan sebagai edu tourism di Malaysia.

Hutan Simpan Ayer Hitam terletak di bawah bidang kuasa Jabatan Perhutanan Negeri Selangor Tengah dan dianugerahkan secara perjanjian jangka panjang selama 80 tahun mulai 1996 oleh Kerajaan Negeri Selangor kepada UPM untuk tujuan penyelidikan, pendidikan, dan pengembangan perhutanan.

Berita ini disediakan oleh Seksyen Media, Bahagian Komunikasi Korporat UPM. (Mohd Faisal Md Noor, 03-89466013, Fotografi Ahmad Fua'ad Alwi, 03-89466199).